

宋文鑑

第一函
十二冊

宋文鑑卷第二十一

詩

七言古詩

禁直

滄浪亭

希真堂東手種菊花十月始開

哭梅聖俞

和賈相公覽杜工部北征篇

白鵲圖

送葛都官南歸

和吳冲卿元會

諭學

漁翁

朱雲

楊億

歐陽修

歐陽修

歐陽修

宋祁

梅堯臣

梅堯臣

梅堯臣

孫復

劉敞

劉敞

道傍田家

司馬光

虎圖

王安石

張良

王安石

寄贈胡先生

王安石

贈陳景回

蘇洵

和渙之深秋月夜書事

狄遵度

雨

狄遵度

有竇復者世居鎮戎能道邊事

王陶

大孤山

黃庶

通判國博命賦假山

陳襄

與子由別於鄭州西門之外馬上賦詩一篇寄之

蘇軾

送安敦秀才失解西歸

蘇軾

送劉道原歸覲南康

蘇軾

和錢安道寄惠建茶

蘇軾

韓幹馬十四匹

蘇軾

贈寫御容妙善師

蘇軾

定惠院寓居月夜偶出

蘇軾

豆粥

蘇軾

答西掖諸公見和

蘇軾

虢國夫人夜游圖

蘇軾

郭熙畫秋山平遠

蘇軾

任氏閨世堂前大檜

蘇轍

韓信二首

黃庭堅

杜子美浣花醉歸圖

黃庭堅

送范德孺知慶州

黃庭堅

送謝公定作竟陵主簿

黃庭堅

過東平侯趙景珍墓

黃庭堅

武昌松風閣

黃庭堅

書磨崖碑後

黃庭堅

滄州亭懷古

沈遼

縱步湘西

張舜民

寒夜

張耒

謁客

張耒

有感

張耒

北鄰賣餅兒

張耒

奉先寺

張耒

美哉

張耒

紫駟馬

許彥國

墨染絲

郭祥正

浯溪

潘大臨

豫章別李元中宣德

謝逸

聞徐師川自京師還豫章

謝逸

早春偶題

崔鷗

阻風雨封家市

李彭

夢訪友生

李彭

禁直

楊億

鳳樓鴛瓦蟾波溼眾籟聲沈百蟲蟄仙盤雲表露成霜何人夜半
牛衣泣芝泥香熟封詔書河漢西傾移斗車陰風撼撼起庭樹寒
澌戛戛鳴宮渠千廬迭唱傳宵警海山鰲背蓬壺頂金缸珠網結
綺錢玉井銀床垂素綆前席受釐詢碩生觀書百斤須中程投籤
乍應嚴彭節求衣誤聽蒼蠅聲渴烏漏盡繁星曙魚鑰建章開萬
戶初日瞳矐豔屋梁鳴鞭一聲下天路

滄浪亭

歐陽修

子美寄我滄浪吟邀我共作滄浪篇滄浪有景不可到使我東望
心悠然荒灣野水氣象古高林翠阜相回環新篁抽笋添夏影老

枿亂發爭春妍水禽閒暇事高格山鳥日夕相啾喧不知此地幾
興廢仰視喬木皆蒼煙堪嗟人迹到不遠雖有來路曾無緣窮奇
極怪誰似子搜索幽隱探神仙初尋一徑入蒙密豁見異境無窮
邊風高月白最宜夜一片瑩淨鋪瓊田清光不辨水與月但見空
碧涵漪漣清風明月本無價可惜祇賣四萬錢又疑此境天乞與
壯士憔悴天應憐鴟夷古亦有獨往江湖波濤渺翻天崎嶇世路
欲脫去反以身試蛟龍淵豈如扁舟任飄瓦紅蕖綠浪搖醉眠丈
夫身在豈長弃新詩美酒聊窮年雖然不許俗客到莫惜佳句人
閒傳

希真堂東手種菊花十月始開

歐陽修

當春種花唯恐遲我獨種菊君勿謂春枝滿園爛張錦風雨須臾
落顛倒看多易厭情不專鬪紫誇紅隨俗好豁然高秋天地肅百
物衰陵誰暇弔君看金蘂正芬敷曉日浮霜相照耀煌煌正色秀
可飡藹藹清香寒愈峭高人避喧守幽獨淑女靜容羞窈窕方當

搖落看轉佳慰我寂寥何以報時攜一罇相就飲如得貧交論久
要我從多難壯心衰迹與世人殊靜躁種花不種兒女花老大安
能逐年少

哭梅聖俞

歐陽修

昔逢詩老伊水頭青衫白馬渡伊流灘聲八節響石樓坐中辭氣
凌清秋一飲百盞不言休酒酣思逸語更道河南丞相稱賢侯後
車日載枚與鄒我年最少力方優明珠白璧相報投詩成希深擁
鼻謳師魯卷舌藏戈矛三十年間如轉眸屈指十九歸山邱凋零
所餘身百憂晚登玉墀侍珠旒詩老薨鹽太學愁乖離會合謂無
由此會天幸非人謀頷鬚已白齒根浮子年加我貌則不歡猶可
強閒屢偷不覺歲月成淹留文章落筆動九州釜飫過午無饋餽
良時易失不早收篋櫝瓦礫遺琳璆薦賢轉石古所尤此事有職
非吾羞命也難知理莫求名聲赫赫掩諸幽翩然素旐歸一舟送
子有淚流如溝

和賈相公覽杜工部北征篇

宋 祁

唐家六葉太平罷宮艷醉骨恬無憂孽虜詬天翠華出模糊戰血
腥九州乾瘡坤痍四海破白日殺氣寒颼颼少陵背賊走行在採
枳拾橡填飢喉眼前亂離不忍見作詩感慨陳大猷北征之篇辭
最切讀者心隕如搖蕩莫肯念亂小雅怨自然流涕袁安愁才高
位下言不入憤氣鬱屈蟠長虬今日奔亡匪天作向來顛倒皆廟
謀忠骸佞骨相撐拄一燎同燼悲崑邱相君覽古慨前事追美子
美真詩流前王不見後王見願以此語詒千秋

白鶻圖

得黃筌事於景仁

梅堯臣

雙睛射空眼角聳筋爪入節溝條垂翅排霜刀毛綴甲雪色愁突
秋雲披當時始得不知價朝發海東夕九疑世爲奇俊玩不足奪
質移神歸畫師而今推向深堂上燕雀屏絕寧來窺畫師黃筌出
西蜀成都范君能具知范云筌筆不取次自養鷹鷂觀所宜毳毛
植立各有態剡奇剔怪乃肯爲尋常飼鷹多捕鼠捕鼠往往驅其

兒其兒長大好飛走其孫賣鼠迭又衰范君語此亦有味欲戒近習無他移

送葛都官南歸

梅堯臣

不羨新爲赤縣尹惟羨暫向江南歸江南羃羃梅雨時風帆差差並鳥飛簪竿夾岸長若梳水籠畜魚鮮且肥家在千山古溪上先應喜鵲噪門扉

和吳沖卿元會

梅堯臣

千官車馬闐闐來晝漏始上闐闐開峨峨左右昇龍進昨夜雪飛雲作堆殿前冠劍魚鱗立東風入仗旗腳迴黃鍾一奏寶扇掩玳簾卷起香霧排鳴梢未盡霹靂響翠輦已退黃金階聖人端冕御法座大樂旅作聲和諧羣公抃蹈丹墀下尙書奏瑞四夷懷乘輿卻入更衣閣通天絳袍陞玉榻百拜稱觴萬歲聞兩廊賜食簪裾匝曲傳太定舞綴疎波旋煙斂飭宮車衛官解嚴多士退日光亭午氣象舒吳君才筆天下傑歸來作詩傳石渠石渠祕邃無凡愚

石渠酬唱皆嚴徐我慙短學復在後收餘掇棄聊以書

論學

孫復

冥觀天地何云爲茫茫萬物爭蕃滋羽毛鱗介各異趣披攘攫搏
紛相隨人亦其閒一物爾餓食渴飲無休時苟非道義充其腹何
異鳥獸安鬚眉人生在學勤始至不勤求至無由期孟軻苟況揚
雄氏當時未必皆生知因其鑽仰久不已遂入聖域爭先馳旣學
便當窮遠大勿事聲病淫哇辭斯文下衰吁已久勉思駕說扶顛
危擊暗毆聾明大道身與姬孔爲藩籬是非豐頓若不學慎無空
使精神疲

漁翁

劉敞

白頭老翁披敗蓑求魚終日罩淮波波深水濶望不絕綱目雖繁
能幾何大魚鱣鰻入淵底小魚鯢鯢登綱裏手數足趼吁可憐何
不爲綱大如天

朱雲

劉敞

志士不忘棄溝壑勇士不忘喪其元伏雞搏狸狗襲虎感激只在精神存漢朝凌替外戚盛五岳振蕩三辰昏臣彊主弱上不悟廷中唯唯誰能言朱生節義邁金石面劾不避師傅尊願求尙方斬馬劍誅一厲百清其源天威振怒不我受利刃接頸雷霆奔當前折檻色不變命在頃刻誰攀援昔時仲尼魯司寇七日行戮端乾坤嗟哉此生志不就冥冥后土埋其冤漢家社稷變王氏張禹虛蒙師保恩卓然先見在物表佞臣販國誰復論我願乘雲款天閭巫陽掌夢招其魂立朝審審辨邪正無復姦諛開幸門

道傍田家

司馬光

田家翁嫗俱垂白敗屋蕭條無壯息翁攜鎌索嫗攜箕自向薄田收黍稷靜夜偷舂避債家比明門外已如麻筋疲力弊不入腹未議縣官租稅促

虎圖

王安石

壯哉非羆亦非羆目光夾鏡當坐隅橫行妥尾不畏逐顧盼欲去

仍躊躇卒然一見心爲動熟視稍稍磨其鬚固知畫者巧爲此此
物安肯來庭除想當槃礴欲畫時睥睨眾史如庸奴神閒意定始
一掃功與造化論錙銖悲風颯颯吹黃蘆上有寒雀驚相呼槎牙
死樹鳴老鳥向之俛噉如哺雛山牆野壁黃昏後馮婦遙看亦下
車

張良

王安石

留侯美好如婦人五世相韓韓入秦傾家爲主合壯士博浪沙中
擊秦帝脫身下邳世不知舉國大索何能爲素書一卷天與之穀
城黃石非吾師固陵解鞍聊出口捕取項羽如嬰兒從來四皓招
不得爲我立棄商山芝洛陽賈誼才能薄擾擾空令絳灌疑

寄贈胡先生

王安石

孔孟去世遠矣信其聖且賢者質諸書焉耳翼之先生與予並時
非若孔孟之遠也聞薦紳先生所稱述又詳於書不待見而後知
其人也歎慕之不足故作是詩

先生天下豪傑魁胸臆廣博天所開文章事業望孔孟不復睥睨
蔡與崔十年留滯東南州飽足藜藿安蒿萊獨鳴道德驚此民
民之聞者源源來高冠大帶滿門下奮如百蟄乘雲雷惡人沮伏善
者起昔時躊躇今騫回先生不試乃能爾誠令得志如何哉吾願
聖帝營太平補葺廊廟扶傾頽披旒發續廣耳目照徹山谷多遺
材先取先生作梁柱以次構架桷與榱羣臣南向帝深拱戴仰堂
陛方崔嵬

丙申歲余在京師鄉人陳景回自南來弃其官得太子中
允景回舊有地在蔡今將治園圃於其閒以自老余嘗
有意於嵩山之下洛水之上買地築室以爲休息之館
而未果今景回欲詩遂道此意景回志余言異日可以
知余之非戲云爾

蘇洵

岷山之陽土如腴江水清滑多鯉魚古人居之富者眾我獨厭倦
思移居平川如手山水蹙恐我後世鄙且愚經行天下愛嵩岳遂

欲買地安妻孥晴原漫漫望不盡山色照野光如濡民生舒緩無
天札衣冠堂堂偉丈夫吾今隱居未有所更後十載不可無聞君
厭蜀樂上蔡占地百頃無邊隅草深野濶足狐兔水種陸收身不
勛誰知李斯顧秦寵不獲牽犬追黃狐今君南去已足老行看嵩
少當吾廬

和渙之深秋月夜書事

狄遵度

洞庭葉下涼颼颼凍天頑白凝不流圓月擬缺不忍缺輕露欲浮
終未浮憶吹朱簾鳳輶上更採紫芝雲嶠陬玉樓天半幾千尺珠
樹玲瓏懸上頭

雨

狄遵度

高林風怒雨聲黑小閣燈背人語闌誰知雲外月高照定是葉閒
鷺最寒時覺急飄愁未已似聞徐滴喜初翻驪駒北首榆關路天
晴煙樹沙磧寬

有竇復者世居鎮戎能道邊事

王陶

君不見鎮戎德順弓箭手耕種官田自防守相團置堡禦蕃軍下
視賊庭殊不有殺羊取骨燃艾灸試卜賊兵知入寇都校招呼入
堡居堡外重圍百里餘牆低城小不難破賊箭如棚城上過堡中
不及數十人且鬪且罵且欣欣登陴斫門謂平取應弦死傷已無
數窗閒走箭射酋豪一箭已聞哭聲舉爭將錦囊裏賊尸鳴金收
眾唯恐遲不唯城堡依然固吾眾不傷毫與釐自從干戈動四鄙
覆軍殺將曾無恥朝廷未省遺邊功何事此勲不聞紀安得天兵
百萬眾盡如此輩堅且勇

大孤山

黃庶

彭蠡百年南國襟萬頃蒼煙插孤岑不知天星何時落春秋不書
不可尋石怪木老鬼所附茲乃與水司浮沈鳴鴟大藤樹下廟祭
血不乾年世深舳艫千里不敢越割牲灑酒來獻斟我行不忍隨
人後許國肝膽神所歆落帆夜宿白鳥岸睥睨百繞寒藤陰銀山
大浪獨夫險比干一片崔嵬心宦遊遠去父母國心病若有山水

淫江南畫工今誰在拂拭東絹傾千金

通判國博命賦假山

陳襄

去年水潦百穀死居民無食食糟粃州之餓者數千人黃巖之民
猶倍徙攜持老少出城郭盡徹牆屋無居止鬻妻棄子人不售價
例不復論羊豕白日市井聞號叫夜堆廊廡如蟲豸縣官哀憐發
賑救一飯纔得一孟爾出門未暇充喉咽已有數十填溝水我時
過之不忍顧往往悲咽胸填委豈無智慮裨萬一遠地不得號君
耳錢侯作倅忠且仁悲憐餓殍如親子日開官廩與之食又令豪
右發儲峙昨日馳書白轉運披陳肝腎獻金矢更乞兵儲二萬斛
民之大命方有倚侯從新年作假山自聞民飢不得視非無泉石
可盤樂人今方瘁何能喜願侯勿遽愛此山念此腰臘存狐蟻天
無疫癘五穀熟生者保聚歸田里此山之石堅不堅將與侯德無
窮已

與子由別於鄭州西門之外馬上賦詩一篇寄之